

山草
隰草

本草便讀

卷一

漢記

本
州
廩

贖

汪
洵
書

端



光緒丙申七月
毗陵張氏刊藏

本草便讀序

人有恒言曰用藥如用兵以藥之不可輕用也然苟用得其當
又未嘗不應手取效藥到病除是操何術以致哉則曰非讀本
草不爲功顧讀本草之難也神農本草經尙已然其中詞旨奧
衍義蘊宏深往往皓首窮年每苦未能得其要領後世著本草
者雜出人自爲說學者旣無所適從且累牘連篇雖有聰穎之
儒亦苦記誦之匪易於此欲求一善本本草使人人得而讀之
且讀之無不人人稱便者蓋憂憂乎其難之今年冬月吳君靜

甫以張君兆嘉先生所著本草便讀見示并囑爲弁言余讀之
見其著墨無多而一藥之中凡性味氣質以及經絡臟腑與一
切配合炒製之法靡不備具言雖簡而意自賅學者讀之旣省
記誦之煩又悟指歸之趣以此稱便便何如矣有志業醫者果
能守是編爲楷模將見用力少而成功多由是玩而味之更由
是神而明之夫如是各家之本草可以參亦如是各家之本草
可以廢豈惟便於一時已哉千百世之後吾知因利乘便陰受
是編之福者當不少也是爲序

光緒十六年歲在庚寅嘉平月

賜進士出身同知銜知武進縣事愚弟吳炳拜撰



本草便讀序

本草一書名人著述甚多而求其便於讀者不數覲也東垣藥性賦雲林藥性歌括未嘗不簡便易讀而攷其所入臟腑所行經絡與夫一物而枝本異用一名而種類異宜均未詳列則雖讀猶之不讀也李士材醫宗必讀本草二卷句聯字偶縷晰條分習醫家無不讀之稱便然而臟腑經絡未經組織枝本種類未盡周備終不足使讀者快然近時善本如陳修園之本草經讀黃元御之長沙藥解玉楸藥解幾於家置一編矣而經讀意

存復古句讀悉本經文仍不便於讀也長沙藥解句斟字酌便於讀矣而玉楸藥解不無參差之處讀之而猶多未便於以嘆本草讀本之盡善者誠不易觀也歲壬辰

張君兆嘉出所著本草便讀示余屬爲弁言余讀之見其於性味甚辨晰也臟腑經絡甚周至也枝本之用種類之宜甚明備也而字句之不錘自煉對偶之不琢自工非數十年積學深思尋繹乎聖經研求乎物理而又具救世之苦心存提攜後進之隱念者未易臻此詣也余欣喜過望爲世之讀本草者幸焉是

爲序

光緒十八年歲次壬辰

愚弟惲思贊頓首拜撰





序

張君兆嘉著本草便讀其兩卷既自序其書邑侯安仁吳公同
邑惲竹坡大令皆遂於醫者亦序之而從子宇懷又爲張君問
序於余夫千莫之寶非張華不能審其氣邁鍾之操非鍾期不
能識其曲余不知醫余烏乎序其書雖然固有不能已於言者
余自束髮受讀壯歲挾策都下厯官皖鄂浙三省晚憩吳門嘗
見通人學士著作如林往往裒古今興衰治亂是非得失之要
與夫律厯方輿行陳戰守之略中國四裔強弱向背之幾緯以

諸子旁及稗野彙爲一編系之論說見者歎爲經世才一旦受
事叢脞立見貽笑後世其於醫也亦然蓋醫之爲道橐籥於農
軒發揮於岐跗自是厥後代有其賢書亦大備然而學者怵然
於堂奧之深津涯之廣則相與掇拾糟粕以欺世不復尋途索
逕由易入難以幾於神化是猶經濟家之矜奇好古而不適於
用良可慨也余夙耳張君名今歲之初宇懷年七十得痛痺疾
甚劇乃延張君治之兩月而復余方以爲神及讀是書而知張
君之爲醫固循循然示人以易者於虜其易也其神也庖丁一

日解十二牛不頓芒刃若張君者微特善醫亦可謂善著書矣
若夫是書之用則前序已言之余又奚言光緒二十有一年歲
次乙未季春之月武進盛康拜撰時年八十有二




序

先生余之姻婭也少好讀書及長遭寇亂得足疾渡江求諸名
醫治療不得瘳而家道中落因銳志學醫早夕研究自以己疾
不治欲思操技以治天下之疾先生之心亦良苦矣同治甲子
賊平旋里適 家君宦閩乞歸 家君亦素邃於醫日與 先
生相過從尋繹經論參酌古今往往心爲之折歲戊子余以薄
宦從事鄭州工次暑雨祈寒晨昏無間幾成怯證爰請假歸就
先生治之竟愈 先生出手鈔本草便讀兩冊示余囑爲訂誤

余輾轉奉讀見其每味編作長短偶言將所屬之性味所入之
臟腑前後互辭發明精當考本草一書向無善本可讀卽明季
李士材著本草徵要一卷習醫者皆奉爲圭臬然其間性味臟
腑亦列之於前且語句多不純主治或不切學者憾之斯編簡
而要詳而明不特便學者之讀且足補醫林之缺竊欲授梓以
公同好因匆促北上卽當領謁赴滇事遂不果然未嘗一日忘
也丁酉冬余奉諱里居知此書已爲同里 盛君我彭刊行鄂
渚足見有目共賞十年宦海素願遂償因於讀禮之餘謹序

先生所以著此書之始末與余所以景仰嚮慕之意質諸我彭
以廣流傳云

光緒歲次戊戌春月姻愚姪程福海頓首拜序



自序

粵自神農嘗草木著本草經創始醫道厥後神其技者太古有歧伯少俞中世有扁鵲秦和漢興有太倉公張仲景考方域之異宜辨藥品之真僞按陰陽五行君臣佐使之理著書立說以羽翼本經魏晉以來校修補註者魏有李當之梁有陶宏景北齊有徐之才唐有蘇恭孫思邈陳藏器宋有劉翰掌禹錫唐愐微寇宗奭金元之間有張劉李朱皆其最著者也但名作雖多惜無善本逮有明李時珍出採輯藥品千九百種綜核羣籍八

百餘家集諸家之大成著本草綱目一書誠爲廣大精微盡善盡美但初學者讀之一如望洋觀海卽窮經皓首亦無所折衷其餘之簡便者如備要如從新固能由博返約但皆以所屬之性味所入之臟腑有毒無毒列之於前記誦之難無有甚於此者成學醫二十餘年力購本草數十家朝夕研究以爲業醫者若不先明藥之性味氣之厚薄質之寒溫雖博覽羣書知方知病而不知藥之性其不致運用乖方而草菅人命者幾希矣故遇有一物之性味功用確切不移能與病相當而取效者則每